

Oktòb 2011

konferans jeneral

Redanmsyon

Jezikri

Ekspyasyon

padon

plan sali

repantans

konferans jeneral

Redanmsyon

Pa Eldè LeGrand R. Curtis Jr

Nan Swasanndis yo

Gras ak Kris la, moun kapab chanje lavi yo ak jwenn redanmsyon.

Gen yon pakèt non yo itilize pou rele Senyè Jezikri. Non sa yo ranseye nou sou diferan aspè misyon sakrifis ekspyatwa Senyè a. Pran tit “Sovè a”, paegzanp. Nou tout gen yon ide sou sove vledi paske nou chak te sove anba yon bagay yon jou. Lè nou te piti, sè m nan avèk mwen t ap jwe nan yon ti bato nan yon larivyè lè nou te komèt sotiz pou kite kote ki te ansekirite nou te ye a epi nou te twouve nou ap pouse pa kouran an pou ale nan yon zòn danjere enkonni. Lè papa m te tandè kriye nou, li te kouri vin ede nou, e li te sove nou anba danje larivyè a. Lè m ap panse ak sove, mwen panse ak eksperyans sa a.

Tit “Redanmtè a” ban nou menm pèsesyon sa a tou. “Rachte” vle di pou nou achte oubyen reachte. Nan domèn legal, nou rachte yon pwopriyete lè nou peye ipotèk oswa lòt dèt ki gen sou li . Nan Ansyen Testaman an, Iwa Moyiz la bay diferant fason sèvitè yo ak byen yo te kapab libere, oubyen rachte, pa vèsman lajan (gade Levitik 25:31).

Yon itilizasyon frapan nan ekriti pou mo *rachte* a konsène delivrans pitit Izrayèl yo anba esklavaj nan Lejip. Apre delivrans sa a , Moyiz te di yo: “Se paske Senyè a renmen nou, li delivre nou avèk fòs ponyèt li. Li fè nou soti kite peyi Lejip kote nou te tounen esklav la. Li wete nou anba pouvwa Farawon an” (Detewonòm 7:8).

Tèm Jewova ki rachte pèp Izrayèl la anba esklavaj la repete anpil fwa nan ekriti yo. Souvan, sa fèt pou raple pèp la bonte Senyè a te manifeste nan delivre pitit Izrayèl yo anba men Ejyipsyen yo. Men sa fèt tou pou anseye yo ke t ap gen yon lòt redanmsyon pi enpòtan toujou pou Izrayèl. Leyi te anseye: “Epi Mesi a vini nan totalite tan an, poul kapab rachte pitit lèzòm anba transgresyon an” (2 Nefi 2:26).

Salmis la te ekri: “Men, Bondye ap delivre mwen, l ap wete m anba pouvwa lanmò (Som 49:15).

Senyè a te deklare pa lentèmedyè Ezayi: “Mwen fè peche nou yo disparèt devan je m tankou yon nwaj nan syèl la. Tounen vin jwenn mwen non, paske se mwen menm ki te rachte nou” (Ezayi 44:22).

Natirèlman, redanmsyon yo refere nan twa ekriti sa yo se sakrifis ekspyatwa Jezikri a. Se “redanmsyon an abondans” Bondye eman nou an ba nou an (Som 130:7). Kontrèman avèk redanmsyon nan lwa Moyiz la oubyen nan aranjman legal modèn yo, redanmsyon sa a pa soti nan “bagay ki ka pèdi valè, tankou ajan ak lò” (1 Pyè 1:18). “Granmesi [Kris] ki mouri pou nou an, nou delivre, nou resevwa padon pou peche nou yo, selon richès lagras li” (Efezyen 1:7) Prezidan John Taylor te ansenye ke gras ak sakrifis Redanmtè a, “dèt la peye, redanmsyon an fèt, alyans lan akonpli, lajistis la satisfè, volonte Bondye fèt, epi tout pouvwa ... chita nan menm Pitit Gason Bondye a.” ” (*Teachings of Presidents of the Church: John Taylor* [2001], 44).

Efè redanmsyon sa a pèmèt ke tout pitit Bondye yo venk lanmò fizik. Ki vle di, lanmò tanporèl la simonte epi tout moun ap resisite. Yon lòt aspè redanmsyon Kris sa a se viktwa sou lanmò espirityèl. Atravè soufrans li ak lanmò Li, Kris la peye pou peche tout limanite, sou kondisyon pou chak moun repanti.

Konsa, si nou repanti, nou kapab jwenn padon pou peche nou yo, paske redanmtè a te peye pri a. Se bòn nouvèl pou nou tout, “tout moun fè peche, yo tout vire do bay laglwa Bondye” (Women 3:23). Moun ki elwanye anpil de chemen fidelite yo dezespereman bezwen redanmsyon sa a, e si yo repanti konplètman, yo gen dwa pou reklame li. Men moun k ap efòse yo pou viv yon lavi ladwati yo dezespereman bezwen redanmsyon sa a tou, paske pèsonn pa ka rantre nan prezans Papa a san èd Kris la. Konsa, redanmsyon eman sa a pèmèt lwa jistis ak mizèrikòd yo satisfè nan lavi tout moun ki repanti epi ki swiv Kris la.

“Ala gran, ala gloriye, ala konplè,
gran plan redanmsyon an ye,
kote jistis, lanmou, ak mizèrikòd
rankontre nan amoni diven!”
 (“How Great the Wisdom and the Love,” *Hymns*, no. 195).

Prezidan Boyd K Packer te anseye: “Gen yon Redanmtè, yon Medyatè, ki kanpe dispoze ak kapab pou apeze demann jistis yo epi lonje mizèrikòd bay moun ki repanti yo” ” (“The Mediator,” *Ensign*, Me 1977, 56).

Ekriti yo, literati, ak eksperyans lavi a ranpli avèk istwa redanmsyon. Gras ak Kris la, moun kapab chanje lavi yo epi jwenn redanmsyon. Mwen renmen istwa redanmsyon sa yo.

Mwen gen yon zanmi ki pa t suiv ansèyman Legliz yo nan jenès li. Lè l te jèn adilt, li te reyalize sa l te pèdi paske l pa t ap viv levanjil la. Li te repanti, chanje lavi li, epi konsakre tèt li pou l viv jis. Yon jou, dèzane apre rankont jenès nou yo, mwen te rankontre li nan tanp. Limyè levanjil la te klere nan je li, e mwen te santi li sete yon manm devwe Legliz la ki t ap eseye viv levanjil la totalman. Istwa li se yon istwa redanmsyon.

Yon fwa, mwen te fè entèvyou batèm pou yon ki te komèt yon peche trè grav. Pandan entèvyou a, mwen te mande l si li te konprann ke li pa dwe janm refè peche sa a ankò. Avèk pwofon emosyon nan je li ak nan vwa li, li te di: “O, Prezidan, mwen pa p janm ka fè peche sa a ankò. Se pou rezon sa a k fè m vle batize, pou netwaye m anba efè peche terib sa a.” Istwa li se yon istwa redanmsyon.

Pandan m te konn vizite konferans pye yo ak lòt reyinyon nan ane k pase yo, mwen te toujou transmèt apèl Prezidan Monson nan pou pote sekou bay manm inaktif yo nan Legliz la. Nan yon konferans pye, mwen te rakonte istwa yon manm inaktif ki te retounen totalman aktif apre evèk li ak lòt dirijan te rann ni vizit lakay li, epi yo te di l ke yo te bezwen li, epi yo te aple li pou sèvi nan pawas la. Mesye nan istwa sa a te non sèlman aksepte apèl la men li te chanje lavi li ak abitud li yo epi li te vin retounen totalman aktif nan Legliz.

Yon zanmi mwen te nan kongregasyon an kote m t ap rakonte istwa sa a. Mwen te wè figi li k t ap chanje pandan m t ap rakonte istwa a. Li te voye yon mesaj ban mwen nan demen pou te di m ke reyaksyon emosyonèl li a pou istwa a se paske fason bòpè li te retounen aktif nan Legliz la te sanble anpil avèk sa m te rakonte a. Li te di m, kòm rezilta yon visit menmjan an pa yon evèk ak yon envitasyon pou sèvi nan Legliz la, bòpè li te reevalye lavi li ak temwanyaj li, li te fè gwo chanjman nan lavi li, epi li te aksepte apèl la. Mesye reyaktive sa a gen 88 desandan kounyeya ki se manm aktif nan Legliz la.

Nan yon reyinyon kèk jou apre, mwen te rakonte toude istwa yo. Nan demen, mwen te resevwa yon lòt mesaj ki te kòmanse konsa: “Se istwa papa m tou.” Mesaj sa a, ke yon prezidan pye te voye, te rakonte kijan yo te envite papa li pou sèvi nan Legliz la, malgre ke te inaktif e l te gen kèk abitud ki te bezwen chanje. Li te aksepte envitasyon an, epi nan pwosesis la, li te repanti, e finalman li te sèvi kòm prezidan pye epi apres a kòm prezidan misyon, epi li te poze fondasyon pou desandan li rete manm fidèl nan Legliz la.

Kèk semèn apre, mwen te rakonte twa istwa sa yo nan yon lòt konferans pye. Apre reyinyon an, yon mesye te vini kote m epi li te di m ke sa a *se pa t* istwa papa l, men *sete* istwa pa li. Li te rakonte m evenman ki te pouse l repanti ak retounen totalman nan Legliz la. Epi sete konsa. Amezi mwen t ap reponn apèl pou repeche inaktif yo, mwen te wè ak tande istwa apre istwa sou moun ki te reponn yon envitasyon pou retounen epi chanje lavi yo a. Mwen te tande istwa apre istwa sou redanmsyon.

Menmsi nou pa p ka janm repeye Redanmtè a sa li te peye pou nou an, plan redanmsyon an mande nou pou nou fè tout sa nou kapab pou n repanti totalman epi fè volonte Bondye. Apot Orson F. Whitney te ekri:

“Sovè, Redanmtè nanm mwen,
Ki geri m pa men puisan li,
Ki relve m avèk pouvwa mèveye Li
Epi ranpli tas anmè m nan avèk bagay dous!
Ki lang k ap kapab eksprime rekonesans mwen,
O chè Bondye Izrayèl.
Jamè mwen pa p ka repeye ou, Senyè,
Men mwen ka renmen ou. Pawòl pi w la,
Èske li pat sèl plezi mwen,
Lajwa mwen lajounen, ak rèv mwen lannuit?”

Konsa kite bouch mwen kontinye pwoklame li,
E tout lavi mwen reflekte volonte ou”
 (“Savior, Redeemer of My Soul,” *Hymns*, no. 112).

Mwen rann temwanyaj mwen sou pouvwa Sakrifis Ekspyatwa Kris la. Lè nou repanti epi nou vini jwenn Li, nou kapab resevwa tout benediksyon lavi etènèl yo. Pou nou kapab fè sa, pou nou resevwa pwòp istwa redanmsyon pa nou, mwen priye nan non Jezikri, amèn.